

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 14, No. 576

原始資料: 蕭鎮國大德提供, 維習安大德提供之高麗藏 CD 經文, 闍學新大德輸入 / Gamblers 大德初校 / 沈介磐大德二校, 北美某大德提供

No. 576 [Nos. 575, 577]

佛說轉有經

元魏天竺三藏佛陀扇多譯

如是我聞。一時婆伽婆。住王舍城迦蘭陀竹林。大比丘眾之所圍遶。一千二百五十人俱。菩薩摩訶薩無量無邊。爾時摩伽陀王頻婆娑羅。出王舍城。往至迦蘭陀竹林住處。到佛所已。頭面禮足。遶佛三匝。却坐一面。爾時如來。知頻婆娑羅王坐一面已。告言。大王。譬如有人於睡夢中。共彼女寶行於欲事。彼人覺已憶彼女寶。大王於意云何。夢中女寶為是有不。王即答言不也世尊。

復問王言。大王於意云何。彼人若執夢中女者。是點慧不。王即答言。不也世尊。何以故。彼夢中女畢竟無故。云何而有境界欲事。彼人徒勞。佛言。大王。如是一切愚癡凡夫。以不曾聞佛正法故。眼見諸色。悅豫於心。即執為實。以執著故則有繫縛。以繫縛故則有染著。以染著故。則生貪欲瞋癡等業。若身若口若意等業。然彼身業所作即滅。滅已不依東方而住。如是不依南西北方上下而住。隨命終時。轉彼有識而現後心。大王。彼識不壞。隨業盡處彼業能現。亦如睡夢覺時女寶。如是大王。最後滅識而生後識。或在地獄。或在餓鬼。或在畜生。或阿修羅。或人或天。彼最後識取最後生。識順彼生。如是心識隨業所受。然無有法。從此世間至彼世間。而受生也。大王。滅後識心是名為滅。是初心識如託生者。是彼後生。大王。轉後識時。彼法實不從彼處來而至於此。初識生已亦無所至。何以故。法性相故。大王。最初識心是後識空。業是業空。生是生空。最初心識是初識空。所生之處是生處空。而於彼處不失業果。大王。最後生識於彼即滅。後不斷心。識心順行隨在何處。所受業報即往受故。爾時世尊。而說偈言。

善逝後說時	所有諸言語
皆是假名說	假名想住故
離於言語法	而無有可說
隨所有言說	而說彼諸法
彼不在於彼	法眼見無色
所言見色者	世間執著故
說世法為實	無而和合見
是如來所說	是名方便地

若為真實說 眼則不見色
意不知諸法 此是最祕密
世間我慢說 名本空無名
一切法無名 而以假名說

說此法門時。頻婆娑羅王。及諸大眾。人天龍神。乾闥婆等。聞佛所說。皆大歡喜。信受奉行。

佛說轉有經